

Ms. 307.  
17

Soeser

Ein Christliche Reichpredigt

Z c  
441/a

# Hey dem Begrebnis

weiland des Edlen / Bestrengen vnd  
Ehrnuesten Herrn / Hans Lösern / auff Prettch /  
der Chur Sachsen Erbmarschalln / vnd Churfürstli-  
chen Sechsischen Rath etc. Gehalten zu  
Prettch / den 11. Octob. Anno 80.

X 2207530

Durch

Polycarpum Leiferum D.  
Pfarrern zu Wittenberg.



Wittenberg

Gedruckt bey Simon Grönenberg.



Faint, illegible text, possibly bleed-through from the reverse side of the page.



**D**er Edlen vnd Tugendreichen Frauen / Agnesen / Gebornen von Bünaw / des Gestrengen / Edlen / Ehrnvehsten Herrn Hans Lösers / Erbmarschalln im Churkreis / vnd Churfürstlichen Sechsischen Rath etc. seliger vnd miltter Gedechnus / hinderlassnen Wittib / auff Pretsck / meiner guten Gönnerin.



**M**ittes Gnad vnd Trost / neben meinem Gebet zuuor. Edle / Ehrntugendreiche Frau Marschallkin / gleich wie kein grösser Lieb in der Welt ist / dann die eheliche Lieb zwischen Mann vnd Weib / aus welcher alle ander Lieb herkömmet / also ist auch kein grösser herzenleid / dann wann zwen Eheleut / welche etliche Jahr in gutem Fried vnd Einigkeit beisamen gelebt / etliche Kinder / welche das band solcher Liebe sind / miteinander gezeugt vnd erzogen haben / durch den zeitlichen Todt von einander gerissen werden. Vnd ist gewislich dis ein solcher riss / den kein Mensch angeborner schwachheit halben / wo nicht Gott Gnad vnd stercke verleihet / vberwinden möchte.

Nun ist es aber einmahl also beschaffen / das  
 A z es



es mus dermahl eins hie zeitlich gescheiden sein/ Vnd werden sehr wenig Exempel gefunden/ da zwen Eheleut miteinander sterben / vnd zugleich in ein Grab zusammen gelegt werden. Darumb man bey zeiten sich dessen versehen solle / damit / wenn solche Trennung durch Gott zugeschickt werde / man sich desto Christlicher darcin schicken könne / vnd vnter solchem Creutz nicht ungedültig werde.

D Jhesus aber ist vns nicht von Natur eingepflantz / wird auch durch leibliche vbung nicht in vns gebracht / noch aus der Weltweisen Büchern erlernet / sondern kan allein aus dem Wort der Gnaden / der Wahrheit / vnd des Lebens / welches ewig bleibt / vnd in den Prophetischen vnd Apostolischen Schrifften treulich vnd reichlich verfasst ist / erholet werden.

Nachdem dann nun der Allmechtige nach seinem Beterlichen vnd Gnedigen willen / der Frauwen auch einen solchen Riss an irem Herzen gethan / vnd ein hartes gezeigt hat / in dem das er euch Ewern Lieben Juncker / mit dem jr in die 25 Jahr friedlich gelebt / vnd Neun Kinder / so noch bey m leben / erzeugt vnd erzogen / durch den zeitlichen Tod aus diesem Jamerthal abgefördert vnd zu sich genommen hat / werdet jr solche hohe traurigkeit anders nicht / dann mit lesen / hören vnd betrachten des  
Göttlichen

Göttlichen Worts mildern vnd ringern können.  
 Aus welchem jr lernet / das ein jeder Christ sein  
 Creutz teglich auff sich nemen / vnd dasselb seinem Matth. 16.  
 Herrn Christo mit Gedult nachtragen müsse / so  
 lang / bis er aus diesem Elend in die Ewige Freud  
 versetzt werde. Der vrsach auch jr dis von Chri-  
 sto aufgelegt Creutz desto williger tragen werdet /  
 weil jr wisset / das sein Joch süß / vnd sein last sanfft Matth. 11.  
 ist / Er auch euch vber vermögen nicht versuchen /  
 sondern mitten im Creutz das auskomen / vnd das 1. Cor. 10.  
 jrs ertragen möget / verleihen werde / bis das jr auch  
 (wann es sein Väterlicher wille sein wird) die sterb-  
 ligkeit ableget / mit ewrem lieben Juncker seligen  
 wider zusammen komen / vnd der Ewigen Freud teil-  
 hafftig werdet.

Vnd weil / solche Gedult in ewrem Herzen  
 zuerwecken vnd zustercken / vielleicht auch die Pre-  
 digt / so bey S. G. Begrebnus gehalten worden / die-  
 nen möchte / bin ich wol zu frieden gewesen / das sol-  
 che / Ewrem begeren nach / in den druck komen möch-  
 te / Sonderlich auch der vrsach / weil andere an ew-  
 rem Junckern seligen / einen Spiegel aller Adeli-  
 chen Tugenden haben / Vnd wann sie sich derselben  
 befleissen / inen selbs einen guten Namen / vber wel-  
 chen nichts in der Welt ist / machen können / Wie  
 dann auch ewers Fromen vnd Christlichen Jun-  
 ckers

A 3 ckers



ckers Nahm vnd Ruhm so bald nicht verleschen /  
Sondern lang bey allen Gottsfürchtigen bleiben  
wird.

Seb. 13.

Gott aber alles Trosts / der von den Tod-  
ten ausgeführet hat den grossen Hirten der Scha-  
fe / der mache euch fertig in allen guten wercken zu  
thun seinen willen / vnd schaffe in euch alles was  
für im gefellig ist / durch Jesum Christ / wel-  
chem sey Ehr von Ewigkeit zu Ewig-  
keit / A M E N.

Esate



7  
Esaie LVI Capitel.

**D**er Gerechte kompt vmb / vnd ist niemand  
der es zu herzen neme / vnd heilige Leut wer-  
den auffgerafft / vnd niemand achtet drauff.  
Denn die Gerechten werden weggerafft für dem  
vnglück / vnd die richtig für sich gewandelt haben /  
kommen zum Fried / vnd rugen in iren Kamern.



Auslegung.

**W**ir haben / Geliebte im Herrn Christo /  
auff dismal dem Edlen / Besirengen vnd  
Ehrnuehsten Hans Lösern auff Prettch /  
Erbmarsch alln dieser Chur Sachsen / zum  
theil vnserm lieben Vater / zum teil vnserm  
guten Freund / zum theil vnserm Günstigen  
Herrn vnd Förderer / zum teil vnserer ge-  
trewen vñ lieben Obrigkeit / zu seinem Rhuebellein vnd schlaff-  
kammerlein / mit kummer vnd schmerzen das geleit gegeben /  
Do dann sein Leichnam / der vne allen zweiffel in dieser  
welt ein Tempel vnd wonung des Geists Gottes gewesen ist /  
in dem Staub der Erden eine kurze zeit rugen vnd schlaffen / vnd  
alda der frölichen stimme des Erhengels / der Posaunen Got-  
tes / vnd herlichen zukunfft vnser Herr vnd Seligmachers  
Jesu Christi erwarten wird / wie denn auch wir vnd alle Chri-  
ste in Hoffnung vnd grosser Gedult auff solche offenbarung vn-  
fers

fers Herrn Jesu Christi/des letzten tages vnd stündleins dieser welt/ vnter dem Creuz vnd Trübsal nicht allein warten / sondern auch herzlich nach der erlösung vnser leibs sehnen vnd seuffzen/ wo fern wir auch mit dem Geist Gottes /der do schreien kan/Abba lieber Vater/ begabet sein.

Vn ist aber nicht allein ein lang hergebracht/sondern auch ein ganz löblicher vnd Christlicher gebrauch / das man die Leichnam der heiligen Gottes nicht also stumm vnd mit stillschweigen in die Erde verscharret / Sondern man pflegt auch von alters hero in der Kirchen Gottes/bey solcher frommen/theuren/vnd Werden Männern begrabnussen einen Christlichen Sermon/oder wie mans gemeiniglich nennet/eine Leichpredigt zuthun / dorinnen man zum theil der Abgestorbenen reichen Tugenden / damit sie von Gott begabet gewesen / gedencet / nicht aus heuchelen / sondern andern zum Exempel / das sie in derselben fusstapffen treten / zum theil auch/aus Gottes wort Trost den Lebendigen / besonders aber des Verstorbenen Lieben hinderlassenen befreundten / mittheilet / damit sie lernen vnd wissen / wie sie sich in solches jres Freunds absterben Christlich schicken / jr leben draus bessern/vnd vnter dem Creuz Trost suchen sollen.

Dies beides nun / wie ich verstehe / sollen wir jzt vber dieses vnsern/Gottseliger vñ löblicher gedechtnis/theuren Helden Leich auch verrichten/ das wir nemlich zum theil von seinen reichen vnd herrlichen Tugenden / andern zum Exempel vnd beyispiel reden / zum theil Trost aus der heiligen Schrifte mitteilen allen denen/so vber diesem leidigen fall trawrig vnd betrübt sein.

Vnd so ich wünschen könnte/ so wolt ich jzt von herken wünschen/das ein ander/der mit reicherm geiste/vnd besserem Trost solchs verrichten köndte / diese Leichpredigt thun solt.  
Weil

Weil es aber je mir unwirdigen zuthun ist aufferleget worden/  
 so getröste ich mich dessen/das ich weis/das ich von eines Chri-  
 stlichen Mannes/Christlichem leben vñ Christlichem abschied/  
 nicht bey Vnchristen oder Heiden/die keine hoffnung nicht ha- 1. Tess. 4.  
 ben/sondern bey Christen/ so auff Gottes wort sehen/inen das-  
 selbe lieb vnd angeneh sein lassen/ auch die Auferstehung der  
 Todten vnd Ewiges Leben glauben/reden sol.

Drümb ich nicht zweifele/der Geist Gottes/ der wird ei-  
 nem jeden in seinem hertzen die Lehr vnd Trost/welche ich mit  
 wenig vnd schlechten worten fürbringen werde / also erkleren  
 vnd reichlich fürtragen / das ein jeder selbs wissen wird / wie er  
 sich in den abschied dieses vnsers Christlichen Mitbruders in  
 Christo / schicken solle.

Wollen derwegen jst nicht handeln oder reden / wie  
 man weinen vnd trawren sol / welches für sich selbs nicht vn-  
 recht ist/Aber solches leret einen jeden sein Natur gegen einem  
 bekandten lieben Menschen/sein Christliche Liebe leret es gegen  
 einem jeden Bruder in Christo / vnd die trew leret es fromme  
 Vnterthanen gegen ire Obrigkeit / Sondern wir wollen jst  
 von was anders reden/das vns von natur nicht eingepflantz/  
 noch auch die Weltweisen vnd Naturkündigen Leut in jren  
 büchern leren können/nemlich wie man hoher/fürtrefflicher vñ  
 frommer Leut absterben von dieser Welt ansehen sol / auch  
 wessen man sich in diesem ganz leidigen fal trösten vnd ergehen  
 sol.

Solches aber leret vns der Geist Gottes in den jst ver-  
 lesenen worten des heiligen Propheten Esaie/welcher denn für  
 sich selbst ein erfarnier Schüler vnter dem Creuz vnd im trost  
 gewesen ist. Vnd damit wir solches alles desto bas verrich-  
 ten mögen/auch ein jedes verstehe/ was es aus diesem text ler-  
 nen vnd behalten sol / so wollen wir :

**B** Erstlich



Erstlich/ die wort des heiligen Propheten Esaie fürh  
lich auslegen.

Darnach vnd fürs Andere/ den Nutz/ den wir aus den  
worten haben mögen/erkleren / was wir beides draus lernen  
vnd vns getrösten sollen.

Der Allmechtige Gott/ der ein Gott des reichen trosts ist/ wol-  
le mit seinem Heiligen Geist bey vns sein/ vñ verleihen/ das wir  
solches nicht allein jme zu ehren/ welchs den das fürnemste sein  
sol/ sondern auch vns zum nutz vñ trost handeln mögen: Amen.

Die verlesene wort aber/ **Geliebte im Herrn** / sein  
eine Leichpredigt gewesen des Propheten Esaie / welche er vor  
zweytausent / vnd nahent dreyhundert Jahren / den frommen  
vnd Gottseligen Leuten / so im Jüdischen Land gestorben  
sein/ gethan hat. Vnd wenn wir die wort wollen recht ver-  
stehen/ so müssen wir in denselben auff drey Stück achtung  
geben/ Erstlich sollen wir hören / von weme der Prophet hie  
handelt/ Nemblich von frommen Leuten. Darnach fürs ande-  
re zeigt er auch an / was denselbigen Leuten begegne / Nemblich  
das sie den irigen vnd andern zu früe sterben. Fürs Dritte  
vermeldet er auch / wie gemeiniglich der größte hauff in der  
Welt/ vnd sonderlich die Gottlosen solcher frommen Leut seli-  
ges absterben ansehen. Wir wollen alle drey Stück nach-  
einander aus den worten des Propheten anhören.

Von den frommen Leuten redt der Prophet also/ das  
er jnen drey Titel oder Namen gibt/ mit welchen er beschreibet  
die Frommen Leute / vnd aus welchen man abnemen kan/ wer  
in dieser Welt recht fromb sey. Er nennet sie / **Die Ge-  
rechten / die Heiligen / vnd die so richtig für sich  
wandeln.**

Der erste Titel ist/ das er sie nennet **die Gerechten.**  
Wer ist denn Gerecht in dieser Welt? Meint ich doch / es  
sagte.

sagte der Königliche Prophet David: HErr gehe nicht ins  
gericht mit deinem Knecht. Vnd damit man nicht meinen  
möchte / David hette sich so sehr für GOTT dem HErrn ge-  
fürchtet / vnd andere weren viel frömmere als er gewesen / so  
setzt er bald drauff / Denn für dir ist kein Lebendiger gerecht.  
Vnd im 15 Psalm sagt er / das Gott von Himmel geschawet  
habe auff aller Menschen Kinder / ob er jemand finden möch-  
te / der gerecht were / vnd nach Gott fragte / Aber er habe  
keinen gefunden / auch nicht einen. Vnd so die Himmel / wie  
Job zeuget / vor Gott nicht rein vnd heilig geachtet sind / Ja  
es könnte auch Gott an seinen heiligen Engeln / so er sein stren-  
ges Gericht ansehen wolt / finden / das er tadelt / wieweil we-  
niger / wird ein sündiger Mensch / der die sündt / wie wasser an  
sich gesogen hat / vor Gott gerecht vnd heilig sein? Noch den-  
noch sagt hie der Prophet von Gerechten Leuten / die in dieser  
Welt gelebt haben.

Drumb so müssen wir das nicht von Menschen verste-  
hen / wie wir von Natur sein / Sondern wie wir durch Gottes  
Gnade werden. Gerecht sein wir nicht von Natur / Gerecht  
werden wir nicht gezeuget / noch Gerecht geboren / sondern in  
sünden / wie David sagt / empfehet einen jeden seine Mutter /  
Gerecht aber werden wir erstlich durch den Glauben / do wir  
durch die Heilige Tauff Christo eingeleibet werden / der unsere  
Gerechtigkeit ist / wie Jeremias der Prophet / vñ der Apostel  
Paulus solches zeugen. Dieser Gerecht macht mit seinem er-  
kennnis viel Gerecht. In welcher Gerechtigkeit auch der heilige  
Paulus hat wollen erfunden werden / nemlich / so aus dem  
glauben an Christum kömet / vnd von Gott dem Glauben wird  
zugerechnet. Wer nun nichts guts wirckt / vnd aus eignen wer-  
ck nicht gerecht ist / gleubt aber an den / der die sündt gerecht  
macht / dem wird sein Glaub zur Gerechtigkeit zugerechnet.

B 2 60

Acto. 15.

Korn 11.

1. Job. 1.

Gal. 5.

Job. 2.

So redt nun Esaias von den Leuten / die an den Herrn Christum vnd Messiam / oder Heiland der welt glauben / vnd durch solchen Glauben an in / in iren herken gereiniget / vnd jne als gliedmas seines geistlichen leibes einverleibet sein / do er durch sein blut ire sünde weggewaschen / vnd mit seiner vnschuld vnd Gerechtigkeit ire missethat zugedeckt / das dieselbigen vor Gottes angesicht nicht kommen.

Diese Gerechtigkeit aber des Glaubens / welche vns durch Christum zugeeignet wird / bringet auch mit sich / eine / etlicher massen angefangene gerechtigkeit des lebens. Denn der Glaube ist nicht todt vnd one werck / sondern so wenig ein liecht on schein vnd hitz ist / so wenig ist auch ein rechtschaffener warer Glaub one Werck / der thut sich herfür in alle gliedmassen / das ein solcher Mensch gerechts gedencet / gerechts redt / gerechts thut vnd handelt / nichts fürnimpt / das nicht gerecht were gegen menniglichen mit denen er umbgeheth / zuthun vnd zuhandeln hat. Vnd dis ist der erst Tittel / da der Prophet redt von den Leuten / die durch den Glauben gerecht sein / vnd solche Gerechtigkeit auch in den eusserlichen wercken scheinen lassen.

Darnach neent er sie Heilige Leut. Welches sein aber solche heilige Leute? Es ist ein falscher wahn bey den Menschen / das etliche vermeinen / in der Welt finde man keinen heiligen. Denn man könnte allein die für heiligen schelten / die im Himmel sein / drum man im Vabstumb von keinen Heiligen gewusst hat / denn von den heiligen GOTTES / so gestorben / vnd von den heiligen Märtern / so etwa umb des Christlichen Glaubens willen jr Blut vergossen haben. Etliche aber vermeinen / das / wenn gleich heilige Leut auff der welt möchten gefunden werden / so könnten es doch die gar nicht sein / so im Hausregiment lebten / oder weltliche Hende fürten / oder in Weltlichen Amptern sessen / Sondern  
wenn

wenn einer hat für einen heiligen Menschen wollen gehalten werden/ hat er sich der welt ganz vnd gar entschlagen müssen/ alle Weltliche Ampter auffgesagt / ist in ein Wiltnus gelauffen/ mit keinem Menschen nichts geredt/ keine Menschenspeis geessen / sondern würklichen aus der Erden gegraben/ vñ sich dauon beholffen / vnd die/so in den Wiltnußen schier zu Vnuerminfftigen Thieren worden sein / die sein allein die heiligen Leut gewesen. Oder auffss wenigste hat man die allein für heilige Leute geachtet / die sich auch aller Weltlichen Hendel vnd Ampter entschlagen haben/ alles stehen vnd ligen lassen/ ins Kloster gelauffen/ vnd alda/wie sie fürgeben/Gott mit fasten/wachen vnd beten/ mit brummen/ Messlesen vnd andern vbrungen tag vnd nacht gedienet / do sie doch vielmehr Gott damit erzürnet haben / weil sie dis alles one / ja auch wider sein Wort gethan haben.

Von diesen seltsamen vnd wunderlichen Heiligen redt hie der Prophet nicht/sondern von den Heiligen/ die vnter den Menschen leben/ mit Menschen vmbgehen/ mit inen zuhandeln vnd zuwandeln pflegen / auch erst sterben sollen/ vnd verstehet dodurch die Rechtgleubigen. Es sihet aber der Prophet auff den Geist Gottes/ damit solche fromme vnd heilige Leute begabt sein / der sie heiliget/ reiniget / vnd zu neuen Menschen macht. Act. 15 Dieselbigen weil ire herken durch den heiligen Geist/der in inen wonet / gereiniget werden / der in inen einen waren Glauben vnd Kindlichs vertrauen zu Gott erweckt/ sie füret / das sie all jr thun vnd lassen nach dem wort / willen vnd wolgefallen Gottes anrichten / sind die rechten Heiligen / ob sie gleich mit weltlichen Hendeln vmbgehen/ vnd bisweilen in irem leben straucheln/vnd aus Menschlicher schwachheit fallen.

Als das ich ein schlechts einfeltig exempal gebe. Ein Dienstmagd/wen sie from ist/hat einen waren Glauben an Christum/

vñ wil für einen heiligen Menschen geachtet vnd gehalten werden/so darff sie sich drum nicht der welt entschagen/ von irem dienst lauffen / sondern warte ires beruffs vnd ampts / diene iren Herrn vnd Frauen / mit kochen / mit waschen / mit auskeren / mit Kindertragen/ vnd ander dergleichen arbeit/ Wenn sie dis treulich vnd fleissig verrichtet/ so ist sie in irem stand vnd ampt / so gering vnd verechtlich der auch für der welt ist vnd geachtet wird/ heiliger/ denn alle Mönch vnd Nonnen/ die es jnen tag vnd nacht sawer werden lassen / das sie Gott dienen/ vnd für heiligen geachtet werden. Darumb aber ist eine solche Dienstmagd frömmere vnd heiliger / weil sie thut was in Gottes wort vnd in der heiligen Schrift befohlen ist. Denn das wil Gott haben in seinem wort/ das ein Dienstmagd iren Herrn vnd Frauen sol getrew vnd in irem dienst fleissig sein. Es hat aber Gott nirgend befohlen in seinem Wort/ das einer sol ins Kloster gehen / das er mit Wachen/ Fasten / Casteyen/ murmeln vnd dergleichen/ jme dienen sol / Vnd weil die Dienstmagd thut/ was Gott befohlen hat/ so ist sie heilig. Weil aber die Mönch vnd Nonnen thun / was Gott nicht befohlen / ja auch wol verboten hat/ so sein sie nicht heilig / vnangesehen / das sie für der Welt für die frömbsten vnd heiligsten Leut geachtet werden.

So redt nun hie auch der Prophet Esaias von solchen frommen/ heiligen Leuten/ die in irem dienst/ ampt vnd stande/ darein sie Gott gesetzt hat/ es sey hoher oder nidriger/ im geistlichen oder Weltlichen regiment/ oder auch im Hausleben treulich vnd vleissig leisten / alles was jnen zuthun vnd zuverrichten befohlen ist / vnd die allein sehen auff den Geist Gottes/ damit ire Herzen versiegelt vnd gereiniget sein. Denn welche den Geist Gottes haben/ wie Paulus sagt/ die sein Gottes Kinder vnd die rechten Heiligen/ wie David offte in seinen Psalmen

101

Eph. 6.  
Col. 3.  
Tit. 2.  
2. Pet. 2.

Rom. 8.  
Psal. 11. &  
32, &c.

von solchen heiligen redet / vnd der Apostel Paulus auch an 1. Corin  
 die Corinthen schreibet / **Den Heiligen Gottes** / vnange-  
 sehen / das etliche sündler vnter jnen waren / vnd das sie alle mit-  
 einander mit Weltlichen sachen vmbgiengen / Noch dennoch  
 nennet er sie heilige Leut / wegen des Heiligen Geistes / wel-  
 chen sie in der heiligen Tauff empfangen haben. Das ist der  
 Ander Titel / den der Prophet frommen Leuten giebet.

**Fürs Dritte** aber / Weil der Glaube nicht nur im her-  
 zen verborgen ist / sondern sich auch herfür thut / lest sich in  
 eusserlichen wercken sehen / so redt auch hie der Prophet Esaias  
 von solchen rechtglaubigen vnd heiligen / die nicht allein in jren  
 gedanken heilig sein / sondern richten auch jre werck nach dens-  
 selben / vnd sagt / Sie wandeln richtig für sich / das ist / sie führen  
 ein feinredlichs vñ auffrichtigs Leben / beides gegen hohes vnd  
 nidriges standes Personen. Gegen nidrigen vnd geringern  
 Personen / oder jren Vnterthanen / sein sie so auffrichtig / das  
 sie sehen / damit sie keinen wider das gewissen vnd billigkeit  
 beschweren / sondern beschützen / beschirmen / vnd verteidigen sie  
 in allē rechten / Gegen hohen beflüssigen sie sich auch / das / was  
 sie jrer Obrigkeit leisten sollen / solches alles trewlich geschehe /  
 Vertrawet jnen einer etwas / so sein sie auffrichtig / behalten es  
 bey sich / Sagen sie einem was zu / so halten sie es redlich / Wo  
 man sie vmb rath oder hülff ansucht / do erscheinen sie willig /  
 trewlich vnd auffrichtig / vnd nicht anders / denn als wenn es  
 jre eigene sache were. Denn diese Tugenden allemiteinander  
 befinden sich bey gerechten Heiligen Leuten / das / wie sie mit  
 beständigem Glauben für Gott wandeln / Also handeln sie mit  
 vngeserbter Lieb gegen dem Nehesten / vnd zwar aus der Liebe /  
 welche / wie der Heilige Paulus sie beschreibet / langmütig vnd  
 freundlich ist / die nicht eiuert / die nicht mutwillen treibt / die sich  
 nicht blehet / die sich nicht vngeberdich stellet / die nicht das jre  
 suchet /

suchet / die sich nicht leß erbittern / die nicht trachtet nach schaden / die sich nicht frewet wenns vnrecht zugehet / sondern die sich frewet wenns recht zugehet / Die alles vertregt / die alles vertrawet / die alles hoffet / vnd alles duldet.

Also sehen wir nun / von was Leuten der Prophet handelt / Nemlich von fromen leuten / das sein die / die für G. D. durch den Glauben gerecht worden sein / welchen der Heilige Geist ire herzen gereiniget hat / das sie sich gegen menniglich redlich vnd auffrichtig erzeigen. Weren aber solche Leut nicht werd / das sie lang lebten / damit sie nicht allein den irigen lang vorstehen / sondern auch andern Leuten dienen / rathen / helfen / ja auch zuzeiten einem ganzen Land nützen möchten? Weren sie nicht werd / das sie so lang als Mathusalem gelebt hat / wann die Welt noch so lang stehen möchte / leben sollten? Ja freilich.

Was begegnet inen aber? Der Prophet sagt / Solche Gerechte / heilige vnd auffrichtige Leut / die kommen vmb / Als wolt er sagen / Es ist je war / wenn man Menschlicher weis dauon reden solt / so were es billich / das solche fromme Leut Gott lang leben lies / die Vngerechten aber vnd bösen gestraffe vnd bald aus der Welt weggethan würden / aber die Frommen haben gemeiniglich das glück in der Welt / das sie vmbkommen / vnd entgegen die Gottlosen lang bleiben. Es redt aber der Prophet von den heiligen Gottes / die nicht eines rechten natürlichen todes gestorben sein / sondern bisweilen vnter den Henckern vnd Tyrannen sein vmbgebracht worden / als wenn sie die ärgsten Buben / vnd nicht werd werē / welche die Sonne bescheinen / oder die Erden lenger tragen solte / Wie denn jme dem Propheten Esaie selbs solches widerfaren ist / welchen der Gottlose König Manasses mit einer Säge hat mitten entzwey schneiden lassen / vnd solches ist fast aller Propheten lohn gewesen /

wesen / wie auch die Heiligen Apostel ( die solche Menschen waren / die man aus der Erden hette kraken sollen ) 1. Cor 4. solches erfahren / das sie jedermans scheussal haben sein müssen. Gleiches ist auch begegnet den Heiligen Märtern Gottes / vnd do man sonst Jüden / Türcken vnd Tattern leiden kan / mit jnen umbgehen / ja wol zuzeiten mit jnen frölich sein kan / da kan man doch rechtschaffne fromme Leut nicht leiden / man mag jnen die lust nicht gönnen / sondern müssen vor jren Jaren jemerlich vnd schmechlich umbkommen vnd erwürgt werden.

Es sein aber nicht allein fromme / heilige vnd Guts liebe Leut die / so von Tyrannen umbgebracht werden / sondern auch die / so da von Gott / wie der Prophet sagt / **Weggerafft** werde / das ist / Wenn wirs recht Deudsch reden wollen / die vor der zeit / in der blüe jres alters / do sie erst rechtschaffen jnen selbst vorstehen / vnd andern Leuten / bisweilen auch einem ganken Lande / nutzen vnd dienen könten / dohin sterben / vnd ehe sie jr hohes alter erreichen / zuvor durch den zeitlichen todt aus dieser Welt abgefodert werden. Wer rafft sie aber also auff ? Wer thuts denn ? Es sehts wol in den verlesenen Worten der Prophet nicht ausdrücklich / wer es thue / Aber aus dem ganken Capitel sihet man / das der Prophet von Gott redet. Gott thuts / der rafft solche Gerechte / Heilige / vnd auffrichtige Leut auff. Ey / solt er doch solche Leut in die Welt schencken / damit durch jr Exempel auch andere zu gleicher frömbkeit angereicht würden ? Ja vns gedäncket also / aber vnser **HERN** Gott hat do viel andere gedanken / vnd weil jme solche Lieb sein / dorumb rafft er sie auff / vnd nimpt sie zu sich / Sap. 4. damit sie dem künfftigen Unglück entrimmen.

Vnd ist fürwar dis gar ein köstlichs Gleichnus / Welches der Prophet hie gebraucht. Denn sehet / **Geliebte im**  
**E** **Herrn /**

Herrn / wenn etwa eine brunst einreißt an einem ort / oder wenn Feinde eine Stad plötzlich vberfallen / so seumpf sich einer nicht lang / sondern schickt sich zum fliehen / aber es muß einer hefftig erschrocken sein / das er nicht etwas mit aus seinem Hause neme / Do gehet er aber nicht im ganzen Haus herum / sucht alle alte Lumpen vnd Naderen zusammen / Sondern wenn er etwa stadliche Köstliche Kleinoter hat / von Ketten / von Ringen / von Edelgesteinen / Golt oder Silber / so sihet er / das er nur dieselbigen davon bringe / vnd gedenckt / Wenn ich nur das erhalte vnd errette / die andern hadern mögen gleich immer verbrennen vnd geraubt werden / wil ich doch wol eine weil einen Zehrpennig haben. Das heist auffraffen / do im einer nicht viel weil nimpt alles zusammen zusuchen / sondern nur das beste austraget. Also sagt auch hie der Prophet von Gott / das er die fromen Leute auffraffe vor dem Vnglück. Das ist / wenn vnser Herr Gott wil ein Vnglück vber ein Land schicken / vnd die Leut vmb irer Sünden / grosser Sicherheit vnd vnbusfertigen Lebens wegen straffen / so sihet der Gerechte Gott sich nicht lang in der Welt vmb / rafft nicht alles hudelmans vnd lose Besindlin hinweg / sondern wenn er ein Kern der Trödigkeit ersihet / so nimpt er den weg / rafft in zusammen / damit solche dem künfftigen Vnglück entgehen / nicht in der Brunst vnd Zorn Gottes verderben vnd vmbkommen / vnd rafft also seine edelsten Kleinoter / seine Ketten vnd Edelgestein / die jme am liebsten sein / zusammen / nimpt sie weg / vnd samlet sie in sein Reich.

Wann aber also die frommen weggerafft werden / do erget es jnen wol. Denn sie entfliehen dem Vnglück / das sie nicht dörfen sehen den jammer vnd das elend / das vber ein gankes Land gehen sol / Sie kommen / wie der Prophet alhier sagt / zu fried / vnd ruhen in jren Schlaffkämern. Denn wir wissen

wissen aus Gottes wort / durch sein gnade / das wenn ein solcher frommer vnd Gerechter Mensch stirbet / er nicht allererst darff in das Fegfeyr faren / vnd alda für seine Sünde gnugsam büßen / vnd Straff leiden / das denn den armen Leuten vnter dem Bapstum einen angstzweiffel in jren Herzen bis in den Tode gelassen hat / sondern wir wissen / das wir stracks aufffahren in das Reich Gottes / vnd vnser Seel ist bald in der Schoß Abrahe bey vnserm Heiland **ENR** Xpsto / wie er selbs sagt zum Schecher am Creuz : Heut / heut wirstu bey mir im Paradis sein.

Luc. 16.  
Matth. 27.

Der Leib aber der wird gelegt in die Erden / nicht darumb allein / das er sol ein speis der Würmer werden vnd verwesen / sondern sol da ruhen / als in einer Schlaffkammer / wird auch hinnein gelegt / nicht das er ewig sol drinnen bleiben / vnd verderben / sondern wenn der Lichtemorgen des Ewigen Lebens anbrechen wird / vnd die Sonn der Gerechtigkeit / vnser **HER** Ihesus Christus in Wolcken des Himmels erscheinen wird zum Gericht der Lebendigen vnd der Todten / als denn sol er widerumb aus der Schlaffkammer auffstehen / vnd in das ewige Leben / mit viel mehrer Frewde vnd herlicherm Leibe eingehen / denn er in der Welt gewesen ist / vnd gelebt hat.

Mal. 4.  
Johan. 4.  
1. Cor. 15.

Vnd ist fürwar sonderlich tröstlich zuhören / das der Prophet hie nicht sagt : Sie werden verscharret / oder sie werden von Würmen gefressen / sondern er wil es viel tröstlicher vnd lieblicher machen / Sagt / Solche Gerechte / heilige / vnd auffrichtige / die ruhen in jren Kammern. Was ist doch in der Welt lieblicher / denn der Schlaff ? Wenn einer den ganzen tag hat gearbeitet / ist müde / vnd kompt ins Bette / wie ruhet vnd schlefft er doch da so lieblich / wie wol thut jm doch nur die ruhe vnd der Schlaff ? So ist es nicht allein lieblich / sondern

E 2 dern



dem auch ein nützlich ding vmb den Schloff/ das wenn einer ausgeschlaffen hat/ so ist er des morgens wider lustig/ vnd wacker/ gehet an die vorige arbeit mit so frischem vnd fröhlichem Leib/ als wenn er nie were müde gewesen. Eben also handele Gott mit vns auch. Denn was ist doch das zeitliche Leben anders/ denn wie der Prophet spricht/ do es am besten vnd herrligsten ist/ do ist es mühe vnd arbeit? vnd/ wie Job sagt/ Der Mensch mus immer im streit sein auff Erden? Denn wie ein Landsknecht oder Kriegsmann stets mus im Harnisch sein/ hat weder tag noch nacht keine ruhe/ sondern eitel mühe vnd arbeit/ Wenn er des tages in wind/ regen oder Schnee gewesen ist/ so mus er des nachts noch auff die Schiltwach gehen/ vnd sorg haben/ damit der Feind nicht einfalle noch schaden thue.

Also sein auch wir auff allen seiten vnd örtern mit Feinden vmbbringt vnd vmbgeben/ müssen mit vnserm eigenen Fleisch/ mit dem Sathan/ vnd der bösen Welt stets kempffen vnd streiten. Was solte einem denn tröstlicher/ lustiger/ oder lieblicher sein/ denn das er einmal in sein Schloffkammer köme/ das ist/ das er Gotte seine Seele widergebe/ die er von jm empfangen hat/ Sein Leib aber zur ruhue keme/ damit er an jenem tage desto herrlicher vnd lustiger würde? Denn auch dozumal wir nit mehr so träge/ faule/ lasse/ so sterbliche/ so vergengliche vnd frenckliche Leiber haben werden/ wie wir in dieser Welt haben vmbgetragen/ sondern es werden herliche/ geistliche/ vnd clarificirte Leiber sein. In summa/ solche Leiber werden wir haben/ die nimmermehr nicht Kranck werden können/ kein leiden/ Trübsal in alle Ewigkeit nicht erfahren. Wird das nicht ein fröhlicher morgen sein?

So leicht es aber einem Menschen ist/ einen andern mit ruffen oder zocken vom Schloff zuerwecken/ also leicht wird

psalm. 90.  
Job. 7.

1. Cor. 15.

wird es auch dem HERN Christo sein/das er alle todten auff-  
 erwecken wird/ Vnd obs gleich vns in vnser vernunfft scheint/  
 das es nicht müglich sein könne/das Christus alle Todten auff-  
 ferwecken werde / dennoch lernen wir solches aus Gottes  
 wort/ja wir sein auff den Artikel vnser Christlichen Glau-  
 bens getaufft / das wir glauben eine Auferstehung dieses Flei-  
 sches/ vnd ein ewiges Leben/zu welchem leben/vns Christus so  
 leicht wird bringen können / als leicht/wie ihu gesagt/ einer/der  
 bey einem andern in einem Bette oder Kammer ligt/ in mit ei-  
 nem stoss oder seiner Stim erwecket.

So geschicht es nun solchen frommen Leuten zum be-  
 sten/ wenn sie nur baldweggerafft werden / vnd zur ruhe kom-  
 men/aber der Welt zum Leid / zum theil auch zu grossen scha-  
 den/wie wir iho weiter hören werden.

Wie erzeigt sich dann die Welt/wann solches geschicht/vnd  
 GOTT also die seinigen hinweg nimpt? Hieruon sagt der  
 Prophet: Der Gerechte kommet vmb/vnd niemand ist/der  
 es zu herken neme/Vnd heilige Leut werden auffgerafft / vnd  
 niemand achtet dorauff. Das ist / der Prophet klagt vber  
 die grosse sicherheit der Welt/ das sie nicht drauff achtung  
 gibt / wenn Gott der HERR hie zeitlich einen solchen Man  
 abfodert / sondern vermeinen zum theil / es geschehe one gefar/  
 nach dem gemeinen brauch/Denn es sey ein jeder also geboren/  
 das er wider sterben solle/Andere dörffen noch wol spöttisch vñ  
 hönisch dauon reden: Ey wenn gleich der man ist gestorben/  
 was ist im denn mehr? es ist drümb kein Land ausgestorben?  
 es ist drümb kein Meyerhoff ledig gestorben? es wird ja die  
 Welt des Mannes wegen nicht strack vntergehen/wir werden  
 ja darumb nicht strack gar von haus lassen?das sein offte gemei-  
 ne reden. Vnd obs gleich etlichen etliche tage zu herken ge-  
 het/vnd bekümmert sein/so lang etwa die Leich vor inen stehet/  
 dennoch vergessen sie des Leides bald

E 3 Dis



Dis alles aber ist vnrecht/vnd ist eben das/darüber der Pro-  
phet alhie klagt/das solche heilose Leut den jamer anrichten/vñ  
darumb/well Gott die frommen sterben lasse/ so sey das vnglück  
desto neher. Denn wenn Gott also den Kern der frombkeit  
hinweg nimpt/so sey es ein gewis anzeigen / das das vnglück  
vor der thür sey / vnd das Gott albereit beschlossen habe / wie  
er die Gottlose arge Welt straffen wolle. Die frommen  
zwar rafft er weg/vnd bringt sie zur rhue/ das sie das Herze-  
leid nicht sehen dörfen. Die Gottlosen aber vnd Vnbu-  
fertigen werden wegen jrer sünde wol erfahren / was vber sie ge-  
hen werde.

DIs ist also / Geliebte im Herrn / fürklich die Aus-  
legung der verlesenen wort des Propheten / das wir fürklich  
gehört haben/ Vnser Herr Gott der habe in der argen bösen  
Welt / auch wenn sie am ergsten ist/ noch etliche fromme/ Bes-  
rechte / heilige / auffrichtige Leute / auff die er ein besonders  
auge habe / von welcher wegen er oft einem ganken Lande  
guts thue / Aber wenn er die arge böse Welt straffen wolle/so  
raffe er sie weg / samle sie in sein heiliges / Göttliches Reich /  
allein dorumb/ damit sie dem vnglück entgehen/zur rhue kom-  
men/Er aber desto bessere vnd billichere vrsach habe die Gott-  
losen zustraffen.

### Der Ander Theil dieser Predigt.

**N**Etz nun/fernere/ist es zeit/das wir auch zum andern  
Stück greiffen / vnd hören / Wie wir den gegenwertig-  
igen Text des Propheten Esaie in dem ihigem ganz leis-  
digen vnd trawrigen fall nütlichen gebrauchen sollen. Es  
schreibet aber der heilige Apostel Paulus in seiner Epistel an  
die

die Römer am 15. Alles was zuvor geschrieben ist / das ist Rom 15.  
 uns zur Lehr geschrieben / auff das wir durch Gedult vñ Trost  
 der Schrifft Hoffnung haben. In diesen kurzen vnd wenig  
 worten zeigt uns der Apostel Paulus / zwene fürneme nützen  
 (ob wol derselben sonst mehr sein) der ganken heiligen Schrifft.  
 Einer ist / das wir die Schrifft vnd alle derselben Sprüche  
 sollen gebrauchen uns zur Lehr. Der ander ist / das wir sie  
 sollen gebrauchen zum Trost. Diese beide nützen wollen  
 wir jzt auch betrachten / vnd wird uns beides hoch von nöten  
 sein.

I. Von der Lehr sollen wir mercken / das wir hieraus  
 lernen / wie wir sollen ansehen vnd betrachten die tödlichkeit  
 abgāng frommer / Gerechter / Heiliger / Weiser / vnd auffricht-  
 tiger Menner / vnd was derselbigen absterben bedeuten. Nem-  
 lich / sie bedeuten gewis nichts anders / denn das ein gros un-  
 glück vor der thür sey / welchem / wo fern dasselbig nicht durch  
 zeitlich Bus / reu vnd leid / bey Gott abgewendet wird / die jenig-  
 en schwerlich entgehen / so überbleiben.

Denn es hat Gott in der Welt drey Regimente / dodurch er  
 diese Welt regieret / Das Geistliche / das Weltliche / vnd  
 das Hausregiment / Vnd in allen drey Regimenten helet  
 er den Proceß / Wenn er einem Lande gut thun wil / so schicket  
 er demselben zu / fürtreffliche / verstendige / gewaltige Leut / die  
 gleichsam Seulen des Landes sein. Wenn nun ein solcher Mann  
 in einem Land ist / so kan derselbe offtmals / nicht zwar aus sei-  
 nem verdienst / Sondern aus der Gnade GOTTES / mit  
 seiner frömbkeit dem zorn Gottes begegnen / vnd mit seinem  
 Gebet das unglück also wegwenden / das Gott vmb des eini-  
 gen Menschen willen einem ganken Lande gnade erzeigt / vnd  
 alles guts thue.

Dessen



Wessen wollen wir etliche Exempel anziehen / damit  
 ewre Liebe diese Lehr desto bas mercken möge. Es war der Pros-  
 phet Moyses ein gewaltiger trefflicher Man im Geistlichen  
 Regiment / der hat offte abgewand einen solchen Zorn Got-  
 tes / damit er das ganze Volk Israel vertilgen wolte / Son-  
 derlich aber lesen wir im andern Buch Mose am 32 Capitel /  
 das Gott wolte wegen der Abgötterey alle Israeliten erwürgen  
 in der Wüsten / do kömpt Moyses vnd erhelt mit seinem Ge-  
 bet / das Gott den zorn faren lest.

Also in der ersten Kirchen hat gelebt Ambrosius ein  
 trefflicher frommer Bischoff zu Meyland / Von dem schreiben  
 die Kirchenhistorien / das an des Kayfers Theodosij vnd Ho-  
 norij Hoff sey ein Man gewesen / mit namen Stilico / der hat  
 gesagt: So lang Ambrosius leben wird / so lang wirds  
 kein not mit Welschland haben / Wenn aber er das Neupt wird  
 legen / so wird ganz Welschland zu grund gehen vnd verder-  
 ben. Vnd es hat sich auch befunden / was der gesagt hat.  
 Denn so bald der heilige Ambrosius die Augen hat zuge-  
 than / als bald sein die Gothen vnd Wenden kommen / vnd  
 haben ganz Welschland greulich vnd jammertlich verheret.

Gleicher gestalt / so lang der heilige Augustinus  
 gelebt hat / so lang hat die Stad Hippon in Africa / in welcher  
 er Bischoff gewesen / nicht können gewonnen werden / vnans-  
 gesehen das der Feind vor der Stad gelegē / als bald aber Gott  
 den heiligen Augustinum hinweg genommen hat / ist auff sei-  
 nen Todtfall das vnglück kommen / haben die Wenden in  
 Africa vberhand bekommen / vnd weil sie das mehrer theil  
 Arianisch waren / haben sie die Orthodoxos / das ist / die  
 rechtgleubige Christen verfolget / Mann vnd Weib / alt vnd  
 jung /

jung / Frawen vnd Jungfrawen / Seugend vnd Seugling / auff das aller greulichst ermordet / das ganze Bücher de pers-  
secutione Vandalica geschrieben vnd vorhanden sind.

Vnd was erzele ich viel alte Exempel / da wir wol neue /  
so zu vnsern Lebzeiten sich zugetragen / haben ? Do der  
Thewre Man Gottes D. Martin Luther / seliger ge-  
dehenus / noch gelebt hat / do hat man sich immer befürchtet /  
die Euangelischen werden überzogen werden. Lutherus  
aber hat alweg gesagt / So lang er lebe / so lang getraw er mit  
seinem Gebet solches von Gott zuerbitten / das es nicht gesche-  
he / welches er auch gethan. Er hat aber kaum zu Wittenberg  
begraben werden können / als bald ist das unglück / mit dem  
Schädlichen verderblichen INTERIM, vnd Spanischen  
Krieg kommen / das wenn nicht GOTT aus sondern gnaden  
noch etliche hette übrig behalten / vmb welcher wegen er das  
unglück abgewendt / so were dieses Land in grund zerstört wor-  
den.

Also sehen wir nun / das / wenn Gott im Geistlichen  
Regiment einen fürtrefflichen Man erweckt / vnd denselben  
hernach wider hinweg nimpt / so thut ers gewis darumb / das er  
in vor dem unglück wegraffe / vnd als denn straffen könne.  
Denn diese sind die / von welchen Ezechiel sagt / das sie sich zur  
mauren machen / vnd wider den Riss stehen gegen Gott für  
das Land / das ers nicht verderbe.

Ezech. 22.

Vnd was ist von dem Geistlichen Regiment  
gesagt ist / das ist auch gleichfals von dem Weltlichen zuver-  
stehen. Gott hat vnter Weltlichen Personen auch seine  
heilige Helden vnd Seulen / damit er stütz vnd erhelt das bau-  
fellig Regiment der Welt / vnd vmb derer willen thut er offft  
einem ganzen Lande guts. Als / Joseph war ein Weltlicher /

D doch



doch ein Gottfurchtiger Fürst in Aegypten. Hat aber nicht Gott von Josephs wegen/weil er ein gerechter/heiliger vnd auffrichtiger man gewesen / nicht allein dem ganzen Land Aegypten/ sondern auch andern umbligenden Lendern guts gethan / sie in der grossen theuren zeit erhalten/das sie nicht hungers gestorben sein?

2. Reg. 6.

Also lesen wir vom Naaman (der war ein fürnemer Kriegsfürst im Königreich Syria) das Gott umb des Mannes willen/weil er fromb gewesen/vnd Gott für augen gehabt hat / dem ganzen Königreich guts gethan habe. Da aber Joseph in Aegypten die Augen zugethan / vnd Naaman in Syrien gestorben / als bald ist in beiden Königreichen das vnglück angangen/vnd hat nicht auffgehört/ bis sie beyde gar zu grund gangen sein/wie solches zum theil die heilige / zum theil die andern Schrifften bezeugen. Also auch/was es nach Samuels todt / vnter des Sauls regiment / nach Josias todt/ im Königreich Juda für einen zustand gewonnen / lesen wir in der Jüdischen König geschicht weitläufftig.

Desgleichen in dem Hausregiment / welches das Dritte ist/erwecket **GOTT** auch offtmals in einem Geschlecht einen fürtrefflichen Man / den er mit Gaben zieret/ das er dem ganzen Geschlecht ein ansehen macht/bringt in so hoch/ das er bey allen theur vnd Wert gehalten wird/vnd macht im einen namen/der vber alle mass ehrlich ist.

Wenn aber ein solcher von **GOTT** wird weggerafft / so leret vns alhie der Geist Gottes ein gewisse Regel / das Gott im willen habe ein vnglück zuschießen / vnd zustraffen/ Vnd wil also menniglich gewarnet haben / das sie demselben bey zeit begegnen / vnd solches durch gebürliche mittel abwenden mögen/Wie denn solches eben dieser Prophet Isaias im 3. Capitel

Capitel weitleufftig bezeuget / da er sagt : Der H E R R **III. 9.**  
 H E R R Zebaoth wird von Jerusalem vnd Juda nemen/  
 allerley vorrath / allen vorrath des Brods / vnd allen vorrath  
 des Wassers / starke vnd Kriegsleute / Richter / Propheten/  
 Warsager vnd Eltesten / Heuptleute vber funffzig / vnd ehr-  
 liche Leute / Rethen / vnd Weise Werckleute / vnd Kluge Red-  
 dener / vnd wil inen Jünglinge zu Fürsten geben / vnd Kin-  
 dische sollen vber sie herrschen / vnd das Volck wird schindes-  
 ren treiben / einer vber den andern / ein jeglicher vber seinen  
 Nehesten / vnd der jung wird stolz sein wider den Alten / vnd  
 ein loser Mann wider den Ehrlichen. Sind aber dieses  
 nicht schreckliche drawungen / noch dennoch ist es gewiss / das  
 wo solche Seulen der Kirchen / des Regiments oder der Ge-  
 schlecht hinweg genommen werden / als bald der ander plun-  
 der leicht vber einen hauffen fallet / vnd solche drawung erfül-  
 let werden.

**D**Is nun / Geliebte im Herrn / sollen wir wol  
 beherrigen. Denn wir haben jetz auch hie vor vns stehen die  
 Leich eines solchen theuren vnd Werden Helden / einer solchen  
 Seulen / welche nicht allein ein zier irem Stammen vnd na-  
 men / sondern auch ein Trost dem ganzen Lande / vñ gewislich  
 ein Gerechter / Heiliger vnd auffrichtiger Mann gewesen ist /  
 welches im ein jeder on Heuchelen vnd mit warheit zeugnis  
 geben wird. Dessen Leich / sprich ich / sehen wir da für vns  
 stehen / Sollen derwegen auch dabey bedencken / den verbor-  
 genen vnd heimlichen Raht / vnd fürstehenden zorn Got-  
 tes des H E R R N / den er vber vns Menschen ausschütten vnd  
 ergehen möcht lassen / wo wir nicht mit zeitiger Buß densel-  
 ben abwenden.

**W**nd das ichs ein wenig weitleufftiger ausfüre / so ist  
 D 2 ER

er ein Gerechter Mensch gewesen / Denn ob er gleich auch sünde an jm gehabt / weil er wie ein ander Mensch in sünden empfangen vnd geborn ist worden / vnd derwegen aus Menschlicher schwachheit auch wirkliche sünde begangen / dennoch weil er auff Christum getaufft / vnd an denselben gegleube hat / ist er durch diesen Glauben an Christum vor Gott gerecht gewesen. Wie er denn auch kurz vor seinem ende / da er sich doch noch keines sterbens zum wenigsten versehen / gegen seinem Beichtvater vnd Pfarrer / M. Georgio Colopino / der in die 38 Jar dieses orts im Ampt gewesen / mit diesen ganz Christlichen Worten gesagt / Ich wil all meine sünd nemen / wissentliche vnd vnwissentliche / auch die verborgenen fähl / vnd wil sie zusammen binden in ein bündlein / vnd sie auff das Gerechte Blut Jesu Christi werffen. Darauff er sein Beicht ganz bedächtlich vnd vernünftiglich gethan / vnd nach empfangener Absolution gesprochen: Nun wil ich empfangen den Waren Leib vnd Blut vnser Herr vnd Heilands Jesu Christi / im Brod vnd Wein verborgen. Mit welchen Worten er klar zuerkennen gegeben / das ob er wol von Natur ein Sünder sey / so sey er doch durch das Blut Christi von allen seinen sünden abgewaschen / vnd wolle in Christo als from vnd Gerecht erfunden werden / Zu dessen bestätigung / er das hochwürdige Sacrament gebraucht.

Er ist aber nicht allein für Gott gerecht / sondern auch für der Welt auffrichtig gewesen / Denn sein ganzes leben mit keiner vntugend oder öffentlichem laster besleckt / sondern der Heilige Geist hat in also regieret / das die Gerechtigkeit des Glaubens / welche er im herzen gehabt / Er durch auffrichtigkeit seiner Wort vnd Werck hat scheinen lassen. Er war auffrichtig gegen seiner lieben vnd getrewen hohen Obrigkeit /  
die

die denn ein solch vertrauen auff in gesetzt/ das sie in nicht allein für einen lieben getrewen Fürnemen Rath gehalten/nicht allein in vielen Legationen in vnd auffer des Lands gebraucht/ Sondern auch zum Vice Hoffrichter vnd *perpetuo Commissario* vber die Vniuersitet Wittenberg gesetzt hat/ Welches alles ein anzeigung ist / das/ wo nicht sein **Churfürstlichen Gnaden** ein sonders vertrauen auff in gesetzt / vnd sondere trew vnd auffrichtigkeit bey diesem Manne gespüret / hetten sie in nimmermehr so viel vertrauet.

Er ist auch auffrichtig gewesen gegen seines gleichen. Dann wo etwa vnserer Vniuersitet / wo etwa denen von Adel/wo etwa einer Stadt was beschwerlichs begegnet ist/haben sie zu im ire zuflucht gehabt/ Da ist er allen/die nur zu im kommen/ bey im hülf/rath/ vnd Trost gesucht/ wilfertig erschienen/ Einen jeden so gern gefördert vnd geholffen/ als wenn es jme selbst antreffe. Vnd zweifelt mir nicht/man werde allererst/nachdem man in verlorn/recht sehen vnd erfahren/ was man an im gehabt habe.

Vber das ist er auch auffrichtig gewesen/ gegen seinen lieben Vnterthanen / Vnd mir zweifelt nicht / sie werden alle miteinander / so sie nur die warheit sagen wollen / bekennen müssen vor Gott vnd den menschen / das er sie nicht vber die gebür beschwert / sondern vielmehr in der noth jnen trewlich ausgeholffen habe / vnd glind vnd sanfft gegen jnen gewesen sey / Ausgenomen / wo er seines amptshalb hat müssen einen ernst vnd euer gegen den misshandlungen gebrauchen/ welches zumal auch ein anzeigung eines auffrichtigen redlichen Gemüts vnd herzens ist. So ist er auch entlich auffrichtig gewesen in allen seinem thun vnd handlungen/ gegen menniglichen / mit welchen er vmbzugehen gehabt/ Vnd ich kan mit

D 3 grund



grund vnd warheit sagen / das so lang ich in gefaht / von keinem Menschen niemals gehört habe / das man über in geklagt / oder in etwas vnrechts beschuldiget hette.

Wie er aber ein Gerechter / auffrichtiger Mann gegen Gott / seiner lieben Obrigkeit / seines gleichen / vnd gegen seine Vnterthanen / in allen thun vnd wercken gewesen / also ist er gewislich auch ein lebendiger Heilige gewesen / der nicht allein seines gleichen / Weltlichen Herrn vnd Regenten / Sondern auch wol Geistlichen Personen zum Exempel der heiligkeit könnte fürgestellt werden. Denn er keinen morgen aus seinem Zimmer gegangen / er hat zuvor sein Gebet von hertzen vnd mit andacht gesprochen / vnd Gott sein Seel / Leib / vnd alle Güter befohlen. Darnach ist er im namen Gottes an seine arbeit vnd beruff getretten / vnd trewlich verricht was im befohlen. So ist er auch niemals zu Tisch gefessen / er habe denn sein Gebet gleichfalls entweder mit seinen Kinderlein / oder zuuorn auch mit eignem mund gesprochen / das im Gott die Speis / welche er zu sich nemen solte / auch segnen wolte.

Solche heiligkeit hat er auch in seinem ganken leben scheinen lassen / das er sein Hoffnung vnd vertrauen allein auff den Lebendigen Gott gesetzt / aller Gottslesterung vnd des fluchens sich enthalten / Gottes wort vnd desselben Diener geliebt / gefördert / geehret / Ist gegen seinen Oberrn Ehrerbietig / gegen seines gleichen freundlich / gegen jedern gelind gewesen / warhaftig in seinen reden / vnschädlich in seinen wercken / trewhersig gegen menniglich / das wir also nicht zweiffeln / er ist ein Gerechter / fromer / auffrichtiger / heiliger Mensch / vnd so lang er gelebt / ein Tempel vnd Wohnung des Geists Gottes gewesen / der in zum Lebendigen Heiligen gemacht hat.

Wie

Wie aber Gott die frombkeit vnd Tugend nitmer  
 vnbelohnet lest/also hat er auch diesem seine frombkeit reichlich  
 vergolten/damit Gott bezeuget/das er diesen Man für andern  
 lieb/vnd auff in/als einen getrewen Diener/ein sonder ange  
 gehabt habe/Nemlich/er hat in gesegnet/nicht allein an Leibes  
 gaben/das er ein solche tapffere/ansehnliche/vñ/wie man sagt/  
 Grauitetische Person gewesen/die nicht allein in einem solchen  
 dapffern Helden wol angestanden/Sondern deren sich auch  
 kein Fürst/ja kein König oder Keiser hette schämen dörfen.  
 So hat in Gott auch begnadet mit einer lieblichen vnd fried  
 lichen Ehe/Dann er in ein sonders Christliche/vnd Ehrn  
 tugentreiche Fraw/Agnes genañt/des Gestrengen/Edlen  
 vnd Ehrnuesten Heinrichs von Bünaw zu Drossig seligen  
 Tochter zugefüget hat/mit welcher er nicht allein in die 25 Jar/  
 in höchster lieb/friede vnd einigkeit gelebt/sondern auch Got  
 tes reichen Segen gespüret/der in mit Leibsfrucht gesegnet/vñ  
 in fromme/wolgezogene Kinder/sechs Söne/von welchen  
 gute Hoffnung ist/vnd drey Töchter/welches eine herrliche  
 gabe Gottes/vnd ein geschenck des aller höchsten ist/bescheret.  
 Vber das so war er auch glückhafft/das wormit er vmbgieng/  
 vnd was er angriff/alles gesegnet gewesen ist.

Item es hat in G D E gezieret mit gaben des Ges  
 müts. Denn ob er wol in seiner Jugendt nicht studieret hat/  
 Welches er denn selber offft geklaget/das er also sey verseumpet  
 worden/noch dennoch so war er mit solcher vernunfft/Weis  
 heit/freundligkeit gegen jederman/vnd andern schönen herrli  
 chen Tugenden begabt/sonderlich aber (welches wol zuuer  
 wundern) war er ein solcher Weiser Kluger Redener/das  
 mancher/der sein lebelang drauff studieret/es in nicht nach  
 thun kan. Vnd ist also zu diesen lezten zeiten ein rechter Wun  
 derman gewesen.

Vnd

Vnd zwar/was wir bishero von diesem Manne geredt haben/ist gros/ vñ wunders werd/aber noch grösser ist es vnd mehr zuerwundern/das er in diesem allem nicht ist stols worden. Denn ob er gleich gros Glück gehabt / an zeitlichen Gütern/an Leib/Ehr/ vnd Würden / das in auch hohe Potentaten nicht als jren Diener / sondern als einen Freund tractirt haben / so hat er sich doch dessen nicht überhebt / noch jemand damit gedruckt / welches / wie mich bedünckt/ eine Tugend ist vber alle Tugenden.

ES ist wol eine herliche Tugend / wenn einer kein Gottslesterer ist / nicht leichtfertig schweret / nicht leuget etc. Es ist eine hohe Tugend / wenn einer seiner hohen Obrigkeit getrew ist / vnd auch seinem nehesten solche liebe erzeigt / das er in nicht beleidigt / nicht verleumbdet / nach seinem Gutte nicht trachtet / Sondern sihet / wie er jme dis mög helffen erhalten vnd mehren. Dis sein wol alles herliche schöne Tugenden / mit welchen dieser Held / reichlich ist begabt gewesen / aber diese Tugenden alle miteinander überwindet die Demut / das er in solchem grossen Glück nicht stolzieret / niemand überschnarcht noch überpocht hat / oder vnterdruckt / sondern gegen menniglichen freundlich / glind vnd sanfft sich erzeigt / vnd mit der that bewiesen hat. Vnd wie er des glücks sich nichts überhebt hat / also ist er in vnglück auch nicht Kleinmütig worden / Sondern hat dasselbige beherzt übertragen / also / das er stets / es sey jme wol oder vbel gangen / einerley farb behalten hat.

WEil auch alweg bey grossem glück gros neid mitleufft / ist es bey jme nicht aussenblieben / Aber er hat sich solches nicht überwinden lassen / oder jmands darumb wider angefeindet / sondern mit Gedult vnd Demut übertragen.

ES sagt sonst der Prophet Jeremias: Trohig vnd verzagt

verzagt ist des Menschen herzh / das ist / Wir Menschen sein Jer. 17.  
 fast allemiteinander von natur also verderbet / das wenn es  
 vns wolgethet / so werden wir bald trozig / vergessen wol auch  
 Gottes / vberheben vns desselben / geben keinem kein gut wort /  
 sein zornig / mag vns leicht einer frumb ansehen / oder nicht ge-  
 rade vber den weg gehen / so sehen wir / wie wir in wider treffen.  
 Wenn es vns aber vbel gehet / da wollen wir vns nicht trösten  
 lassen / sondern gar verzagen. Also aber ist dieser vnser Held  
 nicht gesinnet gewesen / Er ist weder im Creuz vngedültig / noch  
 in guten tagen vnd grossen Glück trozig worden / welchs denn  
 fürnemlich hoch zu loben / das er die Gaben Gottes mit danck-  
 barn herzen also gebraucht / das er sie angewendet nicht zur  
 Pracht / noch zur Hoffart / Sondern andern zum heil vnd  
 Trost.

EBen also hat er auch seine Kinder / die im Gott besche-  
 ret / in warer Gottes furcht auffgezogen / Seine Söne zum teil  
 zum Studieren gehalten / zum theil zu andern ehrlichen sach-  
 en gewenet / damit sie heut oder morgen auch Land vnd Leu-  
 ten nutz vnd dienstlich sein möchten. In summa / er ist ge-  
 gen GOTT danckbar / vnd gegen menniglich also freundlich  
 gewesen / das was jme der liebe Gott bescheret hat / im Haus /  
 am Gemüt / vnd sonst / er mit rath vnd that allen mitgethei-  
 let hat.

WEr denn dieser Mann nicht werd / das er hette län-  
 ger gelebt / vnd so alt worden were / als Mathusalem ( wenn  
 es möglich were / das die Welt so lang stünde ) gewesen ist /  
 weil er ein solcher lieber Diener seiner hohen Obrigkeit / ein  
 getrewer föderer aller Gelerten / vnd ein guter Freund allen  
 seines gleichen / ein gütiger Gnediger Juncker vnd Obrig-  
 keit seinen Vnterthanen gewesen / ja der da war ein zier des  
 Hoffs / eine Seul des Vaterlands / ein Ehr seines stands vnd

E na



namens/ein Kern vnd außbund des Adels / vnd ein Trost des  
ganzten Landes / in rathschlägen fürsichtig / in der Regierung  
gerecht / in den straffen ernsthaft / in helffen willig / Kürzlich /  
bey dem man / als bey einem Asylo / teglich reiche hülff / trost /  
heil vnd rath gesucht / vnd auch gefunden hat.

Was geschicht aber? Wie gehet es im? Er wird / wie  
hie der Prophet sagt / auffgerafft. Vnd zwar freilich wird er  
auffgerafft / beides was in / vnd denn auch vns anlans  
get.

So viel in selbs belanget / ist er also auffgerafft wor  
den / das in vnser Herr Gott aus der Welt genommen / so plöz  
lich vnd vnuersehens / das er selbst nicht gewar worden / wie  
im geschehen / vnd ist im also der todt kein todt / Sondern war  
haftig nur ein schlaff gewesen / in welchem er jzt von aller mü  
he vnd arbeit ruhet.

Apoc. 14.

Denn wie die bezeugen / so bey seinem abschied ge  
wesen / so hat er kaum eine Stunde vor demselben noch  
bey seinen ehren betheuret / das im gar wol sey / er füle keine  
beschwerung / vnd so gar keine / das im so wol sey / als den  
tag / welchen im sein liebes Weib vertratet ware / Vnd  
hat in auch GOTT so sanfft lassen sterben / das er  
nicht nur eingeschlaffen / Sondern sich selbst eingefungen hat /  
mit dem schönen Gesang / Gott der Vater wohne vns bey /  
vnd mit vnserm Christlichen Glauben / damit er ja bezeuget  
hat / das / wie er bey seinem Leben ein heiliger Gottes gewest  
sey / also wolle er auch im todt sein / wolle sterben auff dem  
Glauben / darauff er getauffet / vnd welchen er auff der Welt  
bekant hat.

Ist also an im erfüllet worden das jenige / wels  
ches Christus mit einem tewren End bekräftiget / Das / wer an  
im gleube / den todt nicht schmecken solle ewiglich. Denn  
ob der todt süß oder sawr sey / das hat gewislich dieser vnser

Johan. 5.

Mitbrua

Mittbruder nicht gefület / Sondern ist so sanfft eingeschlaffen /  
 Das ers nicht gemerckt hat / vnd ist ist albereit in seiner ruhe.  
 Sein Seel lebt bey Gott / do jr wol ist / Sein Leib aber ist al-  
 lem vnglück vnd elend entgangen / die wir noch mögen zuge-  
 warten haben / Er aber erwartet der seligen zukunfft **CHR** Iusti  
 Jesu / da denn Leib vnd Seel wider zusammen kommen / vnd  
 der Ewigen Freude geniessen werden. Das heist ja recht / er  
 ist auffgerafft worden / so viel in anlanget.

**CR** ist aber auch auffgerafft worden / so viel vns an-  
 langet / wie man auch seinen tod nicht nur bey seinen Unter-  
 thanen / Sondern weit im ganken Lande spüren wird. Denn  
 er vns ja zu zeitlich gestorben / da er allererst neun vnd vierzig  
 Jar ist alt gewesen / vnd noch viel lange Jar menniglich mit  
 gutem rath / hülff vnd Trost hette begegnen vnd erscheinen kön-  
 nen. Nun aber haben wir dis edle Kleinot verlorn / drum  
 wir billich trauern vnd leid tragen sollen / vnd nicht sagen / **CR** /  
 es ist allererst vmb einen Mann zu thun / es ist drum noch kein  
 Kloster ledig gestorben / es wird auch drum die Welt nicht  
 vntergehen. War ist es / Es ist nur ein Mann / Es ist aber /  
 Lieben Freund / ein Fürnemer Man / auff welchen man mehr  
 denn auff andere gemeine Leut sehen sol. Denn wie biswei-  
 len in einem Hause oder Gebew ein Seul ist / welche gleichwol  
 das ganze Gebew nicht allein tregt / dennoch wenn man sie  
 wegnimpt / so bringt es dem ganken Hause grossen mechtigen  
 schaden / Darumb man billich auff dieselbe mehr achtung gibt /  
 damit sie nicht eingehe. Also ist dieser Held auch ein Haupt-  
 seul gewesen des ganken Landes / auff den wir billich ein  
 Aug haben sollen / vnd gedencken / weil vns **CR** den weg-  
 genommen / so werde gewislich ein vnglück vnd schaden vns  
 treffen.

E 2

Was

Was vns aber begegnen möchte / das wil ich jzt nicht  
 ausführen. Leider ist's war / das wir auff allen seiten nichts  
 denn lauter jammer vñ noth sehen / vnd können vns selbs nichts  
 guts zusagen / Sondern werden Propheten vber vnsern eignen  
 hals / das wir bekennen müssen / das Gott straffen werde / allein  
 daran mangelt es / das weil wir dieses mercken / vnd es gewiss  
 dafür halten / das GOTT straffen werde / dennoch niemand  
 bedacht ist / wie man mit zeitlichem raht solchem vnglück begeg-  
 nen möge. Wer dann nun gutem raht folgen wil / der greif-  
 fe zur Bus / lasse jm seine sünde leid sein / bitte solche Gott von  
 herzen abe vnd ruffe in an / das er gnedig sein / vnd den heili-  
 gen Geist vns verleihen wolle / damit wir hinfüro vnser leben  
 nach seinen Geboten anrichten. Vnd in diesem sehe kei-  
 ner auff den andern / sondern ein jeder fange es für sich an /  
 vnd gedencke / er sey der / welcher nicht weniger als andere Got-  
 tes zorn verdienet habe. Wenn wir das theten / so were Got-  
 tes Hand nicht verfürht / Es hette Gott noch viel seiner Leut /  
 doch durch er diesem Lande guts thun könnte / Wenn ers aber thun  
 soll / so müssen wir in drümb bitten.

Isa. 59.

Also sollen nun die Vnterthanen erkennen / das sie  
 Gott heimsuche / weil er inen ein so fromme Obrigkeit genom-  
 men / vnd darneben bitten / das er wolle die jungen Junckhern  
 mit seinem Geist erhalten vnd regieren / das sie in jres Herrn  
 Vaters / seligen / Fusstappen treten / vnd gleicher gestalt aller  
 Christlichen Löblichen Tugenden sich befleissigen mögen.  
 Andere sein schuldig vor sich selbs zubitten / das Gott sie mit  
 seinem heiligen Geist regieren wolle / das sie solch vnglück er-  
 kennen / diesen fall nicht verachten / sondern zu herzen gehen  
 lassen / vnd sich befleissigen in gleichen Tugenden sich zu vben /  
 damit Gott auch irethalben einem gansen Lande guts thun mö-  
 ge.

Wir alle miteinander sein schuldig Gott zu bitten /

das

das er vnser liebe hohe Obrigkeit lange zeit gnediglich erhalten / vnd derselben verstendige Diener geben wolle / Welche mit irem rath vns vnd vielen Leuten nützlich für stehen können.

WENN wir diesen trawrigen fall also betrachteten / würde fürwar vnser keines sein / welchs nicht ein nützlich Lehr draus fassen / vnd ein herzlichs mitleiden haben würde / vnd gedencen: Ach/ mir ist ein Vater/ ein Freund/ ja ein Förderer gestorben / vnd ich habe hieben zu lernen / das Gott mich vmb meiner sünden willen straffen wolle / in dem er mir diesen Mann / dessen ich mich so viel noch zugetrösten gehabt / hinweg nimpt / ich mus anfahen mich zu bessern / vnd Gott in die Rutten fallen / ehe denn ein grössere straff hernach folget.

ES möcht aber eines jet zu mir sprechen/ Ich habe vermeinet / du soltest trösten / so machstu vns nun trawriger vnd betrübter? Denn wenn wir bedencen / was wir für einen Mann da verlorn haben / der der Hohen Obrigkeit ein lieber vnd Werder Diener / der seinem Stamme vnd Geschlecht eine zierd / der seinem Hause ein Kron / der dem ganzen Land ein Ehr vnd Freud ist gewesen / dessen sich fürneme Leut getröstet / bey welchem Gelerte vnd vngelerte rath gesucht / vnd sonderslich / auff welchen sein Weib / Kinder / Freund / Diener vnd Vnterthanen iren Trost gesetzt haben / Wo sollen wir nun hin / nachdem wir in verloren haben?

Beliebte im Herrn / Wir sollen nicht vermeinen / das / ob vns wol Gott ein hartes gezeigt hat / in dem er vns vnsern lieben Mann / Vater / Freund / Junckhern / vnd Förderer hinweg genommen hat / darumb mit im aller Trost abgestorben sey / Sondern wir wollen vns zum HERRN keren / vnd sein Angesicht suchen / dann er hat vns zerrissen / vnd wird vns auch heilen / Er hat vns geschlagen / er wird vns auch verbin-

II.  
Psal. 60.

E 3                      der.



den / vnd wider trösten. Sonderlich aber in den verle-  
senen Worten / helt vns der Prophet dreyerley kräftige  
Trost für / welche alle betrübte Herzen wider erquickten kön-  
nen / wo sie sich derselben nur mit ernst vnd von Herzen anneh-  
men.

**D**er Erste ist / das sie wissen / Wer diesen vnsern  
in **E** **N** **I** **S** **E** **D** Mitbrudern weggerafft habe / Neme-  
lich / **G** **O** **T** **T** hats gethan / der hat in weggerafft. In  
dem Wörtlein Gott / do steckt ein solcher kräftiger Trost /  
das ich einem keinen bessern zusagen wüßte. Denn weil  
es **G** **O** **T** **T** thut / so sollen wir stracks gedencen / **G** **O** **T**  
ist Gerecht / was er thut / das kan nicht vnrecht sein / er  
thue auch was er wolle / Weil er denn nun recht thut / so  
sol ich nicht so klagen / murren / vngedültig mich stellen / da-  
mit ich in nicht mehr vnd hefftiger erzürne. Denn wenn  
man einem recht thut / so ist alles klagen auffgehoben / wie  
das ein jeder wol verstehet. Wenn eine Obrigkeit einen der wi-  
der recht gehandelt dem rechten nach straffet / so hat derselbe  
nicht zu klagen / das im vnrecht geschehe : Also wenn vns Gott  
Creutz vnd Trübsal zuschickt / da sollen wir nicht klagen /  
nicht wider in murren / noch vngedültig werden / Sondern  
gedencen / **G** **O** **T** **T** ist Gerecht / vnd alle seine Wege  
sind nichts denn Gericht vnd Gerechtigkeit / drum so wil ich  
das klagen lassen.

**E** **N** ist aber nicht allein ein Gerechter Gott / Son-  
dern auch ein Gütiger **G** **O** **T** **T** / vnd vnser lieber Vater /  
Drumb

Drümb wenn er schon durch Creutz mit vns handelt / meine  
 ers doch gutt / Meint ers aber gut / was wollen wir vns  
 denn viel beklagen? Gewis ist es / daß es **GOTT** alzeit  
 gut mit den seinen meinet / Allein daran fehlet es / das wir  
 es nicht alweg verstehen können / was vns gut sey / vnd wie  
 es **GOTT** gut meine. Wenn wirs aber schon jso nicht ver-  
 stehen / sollen wir doch **GOTT** die Ehre geben / als vnserm  
 Schöpffer vnd Herrn / ime zugefallen glauben / das ers  
 herzlich gut mit vns meine / vnd darneben bitten / daß er mit  
 seinem Heiligen Geist vnsern Herzen erleuchten wolle / daß  
 wir mit der zeit verstehen lernen / wie es vns gut sey. Hier-  
 von schreibet S. Paulus herrlich / da er sagt: Mein Son / 2eb. 17.  
 achte nicht gering die züchtigung des **HERREN** / vnd ver-  
 zage nicht / wenn du von im gestrafft wirst / Denn welchen  
 der **HERRE** lieb hat / den züchtiget er / vnd setzt bald  
 drauff: Alle Züchtigung aber / wenn sie da ist / gedüncke  
 sie vns nicht Freude / Sondern Traurigkeit / aber hernach  
 wird sie geben / eine Friedsame Frucht der Gerechtigkeit / de-  
 nen die dadurch geübt sein. Wer nun solches nicht verste-  
 hen kan / der jergreiffe es mit dem Glauben / vnd bete / daß im  
 das Verstantnis geöffnet werde.

Aber / lieben Freund / wir vermeinen jimmer / es sey nichts  
 leichters denn Glauben vnd Beten / vnd wenn vns die Predi-  
 ger in der Kirchen jimmer dazu vermanen / treiben vnd lehren /  
 werden wirs überdrüssig / ja wol schier ungedültig / sagen / Ey /  
 was plagen vns doch die Prediger viel / das sie vns nur jimmer  
 leren / wie wir glauben / wie wir beten sollen / das haben wir ja  
 schon langst gelernt / etc. Ja wir meinens wol wir habens  
 gelernet / Wenn aber ein Creuz daher kompt / da fület man

da

da spüret man erst / ob es leicht sey oder nicht. Denn ist im  
 nicht so / Wenn du franck bist / so sagstu / ach es ist mir so angst  
 vnd so wehe / das ich warlich nicht recht beten kan / vnd können  
 also am wenigsten beten / wenn wirs am nötigsten bedörffen.  
 Also was meinen wir / das leichter sey denn Gleuben? Wenn  
 aber Gott kömpt / nimpt einer Frawen jren lieben Mann / ei-  
 nem Man sein liebes frommes Weib / Eltern jre liebe Kinder /  
 oder Kindern jren lieben Vater / vnd du solt gleuben / das es  
 GOTT gut mit dir meine / wo findet man da den Gleuben?  
 Wenn wir einen rechten Gleuben an Gott hetten / so würden  
 wir gedenccken / Sihe / es hat Gott die Seel deines Mannes /  
 deines Weibes / deines Kindes / deines Vaters / etc. bey sich /  
 verwaret dieselb viel besser / als du sie selbs bewaren köntest.  
 Vnd ob es dich wol schwer ankommen würd / das du einen  
 solchen Freund / einen solchen Trost verloren hast / so weistu  
 doch / das du darumb nicht verderben müssest. Ist doch  
 Gott nicht mit abgestorben / Der lebt noch / an den glaub / dies-  
 sem vertraue / vnd wisse / das er dich nicht verlassen werde.  
 Aber weil das Creutz da ist / können wir solches nicht / oder ja  
 schwerlich gleuben / vnd wil vns der Glaub vnter den henden  
 zerrinnen.

Also wenn wir teglich im Vater vnser beten / Dein  
 will geschehe / vermeinen wir / wir verstehen es woll / vnd  
 komme vns dis beten leicht an / wenn aber das Creutz da ist / so  
 verstehen wirs / das es wol besser taugte. Denn wir gedenc-  
 cken da nicht / das Gottes Wille im Creutz ein gütiger vñ gne-  
 diger Will sey. Denn wenn wir das bedechten / so würden wir  
 ja nicht vngedültig drüber werden / würden nicht klagen / son-  
 dern vns gedültig drein ergeben / vnd gedenccken / er verstehe  
 vnd wisse viel besser / was vns gutt vnd nützlich ist / als wir  
 selbs. So ist nun das der erste Trost / das wir wissen / das  
 der

der trawrige vnd leidige fall nicht on gefehr / Sondern aus  
verwilligung Gottes geschehen sen / der nicht allein ein Gerech-  
ter Gott ist / vnd kan nicht vnrecht thun / sondern ist auch ein  
Gütiger Gott / der es Herklich gut mit vns meinet / vnd ob er  
vns gleich Creuz zuschickt / so müsse doch auch dasselb zum be-  
sten gereichen.

Rom. 8.

**D**er ander Trost / den wir aus diesem Text behal-  
ten sollen / ist dieser / das er sagt / das solche Gerechte / heilige vnd  
aufrichtige Leut werden weggerafft für dem vnglück. Dies-  
sen Trost sollen wir also verstehen. Wenn einer einen lie-  
ben Freund in der Welt hat / so gönnet er jm alles guts / vnd  
wenn er hoch vnd wol ankömpt / so frewet er sichs / wann er  
schon nicht stäts vmb jm ist / Gehet es jm aber vbel / so ist er traw-  
rig / vnd tregt ein herklichs mitteleiden mit jm. Also wenn  
eine Mutter einen lieben Son hat / so wolt vnd sehe sie wol  
gern / das sie in daheim bey sich hette. Wenn aber ein Fürst  
oder Herr denselben begeret / wil in gebrauchen / so gibt sie jm in  
gern / weil sie weis / das jr Son alda wol versorget ist / so wol /  
ja wol besser als sie in daheim hette versorgen können / ist also  
der Mutter jr Son wol lieb / aber noch lieber ist es jr / das sich  
der Fürst jr mit so grossen gnaden annimpt / wil jr jren Son  
erziehen / dem sie in dann auch gern folgen lässt.

Also sollen wir auch hie gedenccken / Dieser vnser Herr  
vnd Freund / weil er bey vns gelebt / ist er vns herklich lieb ge-  
wesen / nachdem in aber jso Gott zu sich genommen / sollen wir  
vns dasselbe viel lieber sein lassen / dieweil in Gott zum Die-  
ner haben wil / das er nicht mehr in weltlichen Händeln sol  
dienen / Sondern dem HErrn Christo selbs auff den Dienst  
warten / der wil in haben / der wil in erhalten vñ bewaren. Vnd  
solches sollen wir vns so viel desto lieber sein lassen / dieweil er  
hie in dieser Welt / wo er lenger hette leben sollen / noch viel

**S** Creuz



Creutz/ Elend/ Angst vnd noch hette austuchen müssen / Iso  
 aber ist er für diesem vnglück allem weggerafft / vnd nun in  
 friede vnd ruh / vnd sol darin mit Gott ewiglich leben / Was  
 könnte jm doch bessers widerfahren sein? Wenn wir jm nun / als  
 vnserm guten Freund / guts gönnen / so sollen wir vns solches  
 seines glücks freuen. Wenn wir aber weheklagen / heulen  
 vnd weinen / was thun wir anders / denn das wir jm dieses glück /  
 Freude / vnd ruhe misgönnen?

Ja spricht eines / Ich höre wol / was du mir sagst / ich sol mein  
 trauren vñ weinen lassen / dieweil ich weis / dz es meinem Man /  
 Vater vnd Freund wolgethet / vnd er Iso allem vnglück entrun-  
 nen ist / aber ich weis solchem raht nicht zu folgen / denn Fleisch  
 vnd Blut kan nicht anders denn trauren vnd weinen? Ant-  
 wort. Weinen vnd Klagen verbeut man nicht / denn wer vber  
 einen Laidigen fall nicht trawrig würde / der were kein Christ /  
 ja kein Mensch / sondern ein flos vnd stein. Darumb mag man  
 weinen / aber man mus des weinens auch ein mas machen /  
 wie Syrach leret / da er spricht: Mein Kind / wenn einer  
 stirbt / so beweine in / als sey dir gros leid geschehen / du solt  
 bitterlich weinen vnd herzlich betrübt sein. Er setz aber hin-  
 zu: Tröste dich doch wider / das du nicht zuviel trawrig  
 werdest. Vnd abermals / Treibe die Trawrigkeit fern von dir /  
 denn trawrigkeit tödtet viel Leut.

Syr. 22.  
 & 38.

Idem 30.

1. Thess. 4.

Isa. 30.

Darumb so sol man auch mitten in dem leid ein  
 Christliche mas halten / vnd nach der Lehr Pauli / nicht trau-  
 ren als die Heyden / so kein Hoffnung mehr haben / Sondern  
 sich wider mit Gottes wort trösten. Denn in Hoffnung  
 vnd still sein ist vnser sterck / wie auch mit heulen vnd weinen  
 man nichts besser / sondern ehe erger macht. Vnd wenn eines  
 hierinnen nicht des abgestorbenen ruhe in acht haben wil / sol  
 es

es doch zum wenigsten seines eigenen Leibs vnd seiner Seelen  
 dran schonen. Seines Leibs / damit es nicht durch Traw- Syr. 30.  
 rigkeit im selbst das Leben fürhe / Seiner Seele / auff das es 1. Thess 4.  
 nicht zu einem vnglaubigen Heyden werde / vnd im schwer für-  
 falle / gegen Gott zuuerantworten / wenn es an seinem eigenen  
 Leib zu einem Mörder wird. Derwegen so ist es immer  
 das beste / die sache dem lieben Gott befohlen / sonderlich weil  
 wir wissen / das es vmb unsere abgestorbene so wol stehet / das sie  
 allem vnglück entrinnen sein.

Wid sey also dieses der ander Trost / den wir in die-  
 sem betrüben fahll haben / das wir wissen / das er allem vnglück  
 entrinnen / vnd ist an einem solchen ort ist / da im alle trenen  
 von seinem Angesicht abgewünscht werden / nemlich / bey Gott /  
 seinem Herrn vnd Heyland Jesu Christo / bey allen Heiligen  
 Engeln vnd auserwelten Menschen.

Der dritte Trost / den wir aus diesem Text fassen sol-  
 len / ist dieser / das wir wissen / das er nicht ewig verlorn sey /  
 Sondern wir widerumb zu im kömen werden / vnd ob er gleich  
 hie in die Erden verscharret / so wird er doch nicht ewig drinnen  
 bleiben. Denn was die Seel belanget / ist dieselbig sonder  
 zweiffel bereit in der Ewigen Freude vnd Seligkeit / Der Leib  
 aber wird in der Erden / als in seinem Schlaffkammerlein / wie  
 hie der Prophet sagt / eine kleine kurze zeit ruhen / vnd zu sei-  
 ner zeit wider an dem frölichen morgen des ewigen Lebens  
 auffstehen. Dieses sol vns ja ein herrlicher Trost sein.

Derwegen so las die Heyden trawren / die kein Hoffnung  
 der aufferstehung vnd des ewigen lebens haben / wie Paulus  
 an die Thessalonicher schreibet. Wir aber wissen / das wir  
 einen Herrn haben / der vns vom todt erretten könne / vnd wenn

1. Cor. 15.

wir allein in diesem leben auff Christum hoffeten / so weren wir die aller elendesten Menschen vnter der Sonnen. Weil wir aber wissen / das wir ein anders Leben zugewarten haben / da wir vnd alle vnser gute Freunde / wenn sie in jren Kammern ausgeruhet haben / herfür gehen vnd zusammen kommen werden / so können wir vns desto leichter zu frieden geben / vnd der zeit vnserer zusamenkunft mit Gedult erwarten.

Joh 5.

Ein Hausfraw / wenn sie schon nicht jren Mann für sich sieht / noch mit jm redet / weis aber das er sich hat in die Kammer schlaffen gelegt / wird sie darumb nicht trawrig / kleinmütig / weinet vnd heulet nicht / Sondern sie lezt in in Gottes namen schlaffen / ja freuet sich / das er ruhet / dieweil sie weis / das es vmb wenig stunden zuthun ist / da sie in wider sehen vnd mit jm reden wird.

Eben also müssen wir hie auch thun (vnd wenn wirs nicht thun / so thun wir nicht als Christen) wenn vns ein Vater / ein Ehegemahl stirbt / das wir nicht scheuslich heulen vnd weinen / Sondern gedencen / er schlaffe vnd ruhe in seiner Kammer / Sollen dertwegen in ruhen vnd schlaffen lassen / vnder dessen in vnserm beruff fortfaren / in Gedult vnd Hoffnung vnser ampt thun / vnd nicht zweiffeln / es sey vmb wenig tage / vnd ein kleine zeit zuthun / so werde er wider zu vns / vnd wir zu jm kommen / da wir vns freuen werden mit vnaussprechlicher Frewde / mit einer solchen freude / die kein Aug gesehen / kein Ohr gehöret / vnd in keines Menschen herk kommen / ja eine solche freud / gegen welcher nicht zuvergleichlichen sein wird / alle Trübsal / jammer vnd noth / so wir hie haben ausstehen müssen / Wie Paulus sagt / das alles leiden der Welt / wie gros / schwer es auch sein mag / nicht werd sey der Herrlichkeit / die an vns sol offenbar werden.

Joh 64.  
1. Cor. 2.

Rom. 8.

Ist denn dem also / ey so sollen wir Gott trawen vnd glauben / das Creuz mit Gedult tragen / der traurigkeit ein ende machen / vnd  
nich

nicht zweiffeln / er werde vns solches mit der Ewigen Freude reichlich vergelten.

Also hat sich David getröstet / da im sein Son / der im aus der Bersabea geboren war / starbe / das er weinete vnd fastete / so lang das Kind frantz war / in Hoffnung / er wolte es von Gott erbitten / das es nicht sterbe / Da es aber verschied / stund er von der Erden auff / wusch sich / zog andere Kleider an / vnd nam speise zu sich. Woher nam er aber solchen Trost? Daher / wie er gegen seinen Knechten selbs bekant / weil er wuste / das er mit Fasten / heulen vnd weinen sein Kind nicht widerholen könte / sondern in der Hoffnung stunde / das er zu im faren / vnd dasselbig wider sehen würde.

2. Sam. 12

Ja Gedencet eines / Wann der Herr Christus ist als bald da were / vnd weckte mir meinen Herrn / meinen Vater / mein Kind wider auff / wie er der Widwen zu Nain iren Son erweckt vnd wider gegeben hat / so wolt ich wol zu frieden sein / wie solt mir das eine Freude sein? Gedencet aber hinwider / lieber Christ / was were es für eine Freud? In der Warheit dauon zureden / es were / wie man zu Deudsch sagt / eine Galgenfrist / das ist / es werete die Freude eine kleine zeit / über etliche Jar müste dein Herr / dein Vater / wider sterben / als denn hetze sie wider ein ende / vnd were das Leid denn viel grösser. Was hülfte es denn / wenn schon Christus ist keme / vnd weckte vns diesen vnsern Mittbrudern wider auff / was were es für eine sondere Freude? Er lebt etliche Jar / darnach müste er wider sterben / welchs wir im nicht gönnen solten. Denn ehe er den todt / den er ist nicht gefület hat / wider überstünde / müste er noch viel Creutz / Angst vnd not ausstehen. Viel besser ist es / wir gönnen im seine ruhe / vnd lassen in ist in seiner Kammern schlaffen / bis das auch wir zu derselben ruhe komen / vnd nachmals mit im der Ewigen Freud theilhaftig werden.

Luc. 7.

§ 3 Und



Und dis / Geliebte im Herrn / sey ist gnugsam  
 gnugsam geredt von dem Christlichen Leben vnd absterben  
 dieses vnser Christlichen vnd thewren Helden / Da wir erstlich  
 gelernt haben / wie wir sollen seinen abschied vnd todt ansehen /  
 was er bedeute / vnd was ein jeder dabey bedencken sol / Nem-  
 lich / weil er ein Gerechter / Heiliger vnd auffrichtiger / ein from-  
 mer vnd weiser Mann / dem man das Leben hette kauffen sol-  
 len / gewesen ist / vnd Gott in doch weggerafft hat / also das  
 er den todt nicht gefühlet / Sondern Christlich / loblich vnd  
 seliglich eingeschlaffen ist / vnd wir in also zu zeitlich in der  
 blühe seines alters / da er noch vns vnd andern hette vorstehen  
 vnd dienen können / verloren haben / so bedeut es gewislich  
 nichts anders / denn das Gott ein vnglück schicken / vnd vns  
 vmb vnserer sünde willen straffen werde. Diesem vnglück  
 aber können wir auff keinen andern wege besser vorkommen /  
 Denn so wir vnser Sünde erkennen / vnd tragen selbs ein  
 Christliches mitleiden vber solchem Creuz / bessern vnser Le-  
 ben / beflüssigen vns / das wir gleicher gestalt fromb / Gerechte /  
 Heilige vnd auffrichtige Leut sein / nicht allein den Glauben  
 gegen Gott haben / sondern auch in vngeserbter liebe gegen vn-  
 serm nechsten vns verhalten / vñ mit der that beweisen / das wir  
 heiligen Gottes sein. Wenn wir das theten / so were noch nicht  
 zuuerzagen / sondern Gott könnte noch mit gnaden erscheinen /  
 vnd ob er gleich seine Hand ausgerectt hat zu straffen / so wür-  
 de er doch dieselbig wider zu rück ziehen / vnd mit gnaden er-  
 scheinen.

Jer. 18.

Daneben aber / sollen wir nicht so trawrig sein / wie  
 die Henden / die kein Hoffnung haben / Sondern in diesem  
 allen vns wider trösten vnd Erstlich auff Gott sehen / der ein  
 Gerechter vnd Gütiger Gott ist / vnd ob vns gleich dieser vn-  
 ser Mitbruder ist lieb gewesen / sollen wir vns doch Gott viel  
 lieber

lieber sein lassen/der solches gethan hat / Und weil er in zu sich  
 genommen / so sollen wir in in gerne lassen / Denn der Herr hat **Job. 1.**  
 vns in geben / der hat vns in auch widergenommen / wird in a-  
 ber nicht ewig nemen / sondern zu seiner zeit widerzustellen.  
 Darnach sollen wir wissen / das er allem vnglück / Elend vnd  
 jammer dieser Welt entrungen ist / Gott hat in auffgerafft für  
 dem fünfftigen vnglück / darumb sollen wir in solches nicht  
 misgönnen / sondern Gott dem Herrn dafür danken / vnd bit-  
 ten / das er vns wolle Gedult geben / das wir solches ertragen  
 können. Fürnemlich aber sollen wir vns trösten / das wir  
 wissen / das er nicht ewig verlorn sey / sondern sein Seel lebe bey  
 Gott / Sein Leib aber der ruge vnd schlaffe nur / den wird vnser  
 Heiland **J H E S U S E H R J E S U S** / wenn er am  
 Jüngstentage mit dem Feltgeschrey / vnd der Posaun des Ers-  
 engels kommen wird / aus dem staub der Erden widerumb er-  
 wecken / vnd an seinem grossen tag in Himmel bringen / vnd  
 alda alle seine Christliche Tugenden vnd Werck / nicht mit so  
 wenig vnd schlechten Worten / wie ich ist gethan habe / heraus  
 streichen / sondern aller Welt rhümen / vnd in mit solchen Wor-  
 ten anreden: **Kom her du getrewer Knecht / der du** **Matt. 25.**  
**in wenigem bist getrew gewesen / ich wil dich ober**  
**viel setzen / Gehe ein / in die Freud deines HERRN.**  
 Und werden als denn alle seuffzen vnd threnen nicht allein **Apoc. 22.**  
 von seinen / Sondern auch von vnsern vnd aller Rechtgleu-  
 bigen Augen abgewischt werden / da wir werden **GOTT** den **1. Cor. 13.**  
**Herrn von Angesicht zu Angesicht schauen / wie er ist.** **1. Jo. 3.**

In sey Lob / Ehr vnd Preiss gesagt / von  
 nun an bis in Ewigkeit /  
**AMEN.**



CARMINA LVGVBRIA

in obitum

MAGNIFICI, NOBILITATE

GENERIS, PIETATE, PRVDEN-

TIA ATQVE VIRTVTIBVS QVAM

plurimis Illustris Viri, Dn. IOHANNIS LOESERI,

in Prätſch, Electoratus Saxonici Marſchalli hæreditarii,

ejuſdemq; Conſiliarii primarii, atq; Conſiſtorii

Provincialis Præſidis digniſſimi, &c.

honoris & obſervantiæ cauſa ab

eruditis Viris con-

ſcripta.



*Lange tuum trepidis pectus Respu-*  
*blica palmis,*

*Et luge amiſſum Saxonis ora de-*  
*cus.*

*Plangite Pierides, Charites, Eccleſia, & omnes*

*Cura quibus vera eſt religionis honor.*

*Occidit exhaustus febrî LOESERVS anhela,*

*Virtute & vera nobilitate potens.*

*Cujus & Elector Princeps AVGVSTVS amavit*

*Sincera junctam cum probitate fidem.*

*Nanq; hoc vix alius tenuit belli aptius artes,*

*Pacis amans patriæ cura ſaluſq; fuit.*

*Corde*

Corde pio est semper Christum veneratus, cumq;  
Amplexus coluit justificante fide.  
Fovit doctrinam verbi, verbiq; ministros,  
Maxima quos illi cura juvare fuit.  
Hujus saepe viri turbata Academia nostra  
Optatam dubio tempore sensit opem.  
Hoc orbat a fuit Respublica pluribus anno  
Justicia claris & pietate viris.  
Plurima venturas orbi monstrantia clades  
Vidimus irati tristia signa Dei.  
Longa sub hoc ipsum spaciofo limite tempus  
Flammiferam coepit ducere stella comam.  
Hæc sunt quæ dudum sancti cecinere Prophetæ  
Omina, propicio corda movente Deo.  
Ecce simul terram & lumen vitale relinquunt  
Iusticia insignes & pietate viri,  
Nec tamen afficitur quisquam, nec publica sensus  
Damna movent, animis nec dolor ullus inest.  
At quoniam ingrato contemnit munera fastu  
Mundus, & hoc quod adest negligit omne bo-  
Tollit et ex oculis removet sua dona, nec ultra (nū:  
Esse sinit, videant ut data dona, DEVS.  
Sic etiam è medio sanctos sibi protinùs aufert,  
Inq; salutifero colligit ipse sinu.

G At

At licet humanas retinet vasa mentes,  
Atq; stupor rigido pectore tantus inest:  
Consilii ut nequeant divini cernere causas,  
Nec causas animo simplice nosse velint:  
Venturum ante malum justos tamen eripit, atq;  
Omnibus à curis liberat ipse Deus.  
Vnica qui verbi vestigia recta sequuntur,  
Et sanctas Domini quos juvat ire vias:  
Horum pacato requiescunt membra cubili,  
Æternum vivit Spiritus ante Deum.  
Cumq; aderit cælo cum majestate verendus  
Christus ut humanum judicet omne genus:  
Et caro cum carni jungetur, & ossibus ossa,  
Spiritus & membris consociatus erit:  
Tunc nova concipient æterna gaudia vite,  
Et similes erimus rursus, ut antè, Deo.  
Intereà serva divini dogmata verbi,  
Dum CHRISTE advenias, at citò Christe  
(veni.

M. Martinus Henricus

Theologiæ in Academia Vuite-  
bergenfi Professor.

## A L I V D.

**A** Vla quid *AVGVSTI IANO* tristaris adempto?  
Surreptus, sed non mortuus ille tibi est.  
Nam Pietas, Astræa, graviq; in pectore Candor  
Hunc *IANVM* æterna vivere laude jubent.

*M. Leonhardus Et Zlerus Vratisl.  
Ludi Senatorii apud Vuis  
teberg: Rector.*

## A L I V D.


**D**ostquam, defunctum terris, revocavit Olympus  
Læserum, ac cælo redditus ille fuit:  
Decessu tanti decoris jam vilior orbis  
Squaluit, & luctu concidit ac lachrymis,  
Mutârunt sylva vestitum, arva omnia vultum,  
Et tenuit formam res propè nulla suam.  
At cælum tanto reparato cive refulsit  
Clarius, & solito letius emicuit.  
Extulit ipse facem veniunt patrius æther  
Præcessitq; novæ lucis honore, viam.  
Illam mirata est Phæbi domus utraq;: Terre  
Signantem in magnis non leviora malis.  
Consensit cælo *LEISERVS*: cælitus ipse  
Non dubiè sensus hos, animosq; trahens:  
Nec magnas, dixit, virtutes ferre: dolendum  
Ut quicquam in tanto censeat esse viro.  
Gratandam huic requiem, gratandum, hunc numinis au-  
Evectum nostris altius esse malis. (ra  
Fælicemq; inter Divûm consortia Christo  
Gaudere: & patria jam meliore frui.

*Ar*

7c 4411<sup>a</sup>  
At vos in vestram lachrymas has vertite culpā  
Hunc adimi terris qua meruistis: ait.  
Non mors: quam querimus: nostra illum crimi-  
Præsidium infestis eripuerit malis. (na nobis  
Iam flagro armavit dextram: jam fulmina cepit  
( Quis luat offensam noxia terra ) Deus.  
Ardebit, quem jam sufflando suscitatur ultro,  
Igne: nec à longè est vindicis ira Dei.  
Noscite perniciem propius: stragemq; minantē,  
Iam legit & pænis segregat ipse suos.  
Præripit hos placida venturo morte furori,  
Hoc minus, effusum quod remoretur, erit.  
Indoluit Venerande tuis Vir Concio dictis,  
Seq; ream gemitu testificata fuit.  
At tu qui magnam monstras prænunciis iram,  
Hanc itidem precibus velle levare tuum est.  
Ab non de nihilo est: Nam quid de fonte futurum,  
Insons cum justos occidat ante dies?

Henricus Abraham ab Einfi  
del amoris ergo com-  
posuit.





004.307.17

<sup>Soeser</sup>  
Ein Christliche Leichpredigt

**Hey dem Begrebnis**

weiland des Edlen / Gestrengen vnd  
Ehrnuesten Herrn / Hans Lösern / auff Prettch /  
der Chur Sachsen Erbmarschalln / vnd Churfürstli-  
chen Sechsischen Rath etc. Gehalten zu  
Prettch / den 11. Octob. Anno 80.

Z c  
441/a

X 2207530

Durch

**Polycarpum Leiserum D.**  
Pfarrern zu Wittenberg.



**Wittenberg**

Gedruckt bey Simon Grönenberg.

